

31-08-2026

- प्रधानमंत्री नरेंद्र मोदी होरें अज्ज किर्गिस्तान दी राजधानी बिश्केक च शंघाई सहयोग संगठन-एससीओ दे केई मिम्बर सदस्यें ते विश्व नेताएं कन्नै दपक्खी गल्लबात कीती।
- सरकार नै देश च चिप निर्माण दे पूरे तंत्र गी बढावा देने लेई अज्ज 1 लक्ख 27 ज्हार करोड़ रपे दे बजट आहली सेमीकान दे दुए गेड़ दी योजना गी अधिसूचित कीता ऐ।
- राष्ट्रपति द्रौपदी मुर्मू होरें आखेआ जे कपड़ा सैक्टर ना शड़ा भारत दे सांस्कृतिक विरसे दा इक महत्वपूर्ण हिस्सा ऐ, सगुआं लक्खां बदे लोकें गी रोजी-रूटी बी उपलब्ध करोआंदा ऐ।
- भारती नौसेना नै अज्ज मुम्बई च स्थित निस्टार श्रेणी दे दुए गोताखोरी सहायता पोत-डी.एस.वी- निपुण गी बल च शामिल करी लैता ऐ।
- नेपाल च पिछले हफ्ते आए दे विनाशकारी हाड़ करी मरने आहलें दी गिनतरी बधिये 903 होई गेई ऐ जिसलै के 4 ज्हार 247 कोला मते लोक अजें बी लापता ना।
- भारती दी 20एं बरें कोला हेठली उम्री दी टीम अज्ज ताशकंद दे दोस्तलिक स्टेडियम च सीरिया दे खलाफ ए.एफ.सी-यू-20 एशियाई कप क्वालीफायर अभियान दी शुरूआत करा करदी ऐ।

<><><><><><>

## PM

प्रधानमंत्री नरेंद्र मोदी होरें अज्ज किर्गिस्तान दी राजधानी बिश्केक च 26में शंघाई सहयोग संगठन-एससीओ दे केई मिम्बर सदस्यें ते विश्व नेताएं कन्नै दपक्खी गल्लबात कीती। इनें नेताएं च ईरान दे राष्ट्रपति मसूद पेजेशिक्यन, किर्गिस्तान दे राष्ट्रपति सद्र जापारोव, आर्मेनिया दे प्रधानमंत्री निकोला पाशिनयान शामिल ना। रूस दे राष्ट्रपति व्लादिमीर पुतिन हुंदे कन्नै बी अज्ज उंदी बैठक होनी तय ऐ।

<><><><><><>

## PM-Friends of India

प्रधानमंत्री नरेंद्र मोदी होरें अज्ज किर्गिस्तान दे बिश्केक च फ्रेंड्स आफ इंडिया ग्रुप कन्नै गल्लबात कीती जित्थे ओहू 26में शंघाई सहयोग संगठन एससीओ दे शिखर सम्मेलन च हिस्सा लैने गितै गेदे ना। इस गल्लबात च भारती समुदाय दे सदस्य, शिक्षण जगत दे लोक, शोधकर्ता, योगाभ्यासी, पर्यावरण प्रेमी ते भारती तकनीकी ते आर्थिक सहयोग कार्यक्रम दे विद्यार्थी रेही चुके दे सदस्य बी शामिल ना। इस कार्यक्रम कोला पैहले प्रधानमंत्री होरें बिश्केक स्थित महात्मा गांधी स्मारक पर जाइयै पुष्पांजली भेंट कीती। इस मौके पर प्रधानमंत्री होरें भारत दे किर्गिस्तान बश्कार पराने सांस्कृतिक सरबन्धें ते लोकें-लोकें बश्कार सरबन्धें गी निगार बनाने दी जरूरत पर जोर दित्ता। उनें शिक्षा, योग, अनुसंधान ते सांस्कृतिक आदान-प्रदान दे खेत्तर च भारत कन्नै जुड़े दे लोकें दे जोगदान दी सराहना कीती। कल प्रधानमंत्री मोदी हुंदा शंघाई सहयोग संगठन दे 26में शिखर सम्मेलन गी संबोधित करंगन।

<><><><><><>

## US-Iran Hormuz

अमरीका नै कल रातीं होर्मुज जल डमरु मध्य च स्थित लारक द्वीप पर ईरान दे सैन्य ठकाने पर हमला कीता। अमरीकी सेना नै दस्सेआ जे ईरान दे इस्लामिक रिबोल्यूशनरी गार्ड कोर दे सैनिकें गी होर्मुज जल डमरु मध्य च रॉकेट दागने दी तयारी करदे दिखे जाने मगरा उ'नें 2 ईरानी लांचरें गी निशाना बनाया। ईरान दे सरकारी प्रसारक IRIB नै दस्सेआ ऐ जे इस हमले च केंई ईरानी सैनिक ते नागरिक मारे गे ते घायल होए। लारक द्वीप पर हमला जुलाई दे खीरै मगरा ईरान दे अंदर पैहला नेहा हमला हा जिसले राष्ट्रपति डोनाल्ड ट्रम्प होरें जल डमरु मध्य कन्नै जुड़े दे 2 हफ्ते दे अमरीकी सैन्य अभियान गी रोकी दिता हा। इक अमरीकी अधिकारी नै आखेआ ऐ जे अमरीकी सेना क्षेत्र दी बरीकी कन्नै निगरानी करा"रदी ऐ। होर्मुज जल डमरु थमां होइए बपार दी रक्षा आस्तै तयार ऐ। ईरान नै जवाबी कारवाई करदे होई IRGC नै अमरीकी हमले दे परते च जॉर्डन च अमरीकी ठिकाने पर बैलिस्टिक मिसाइलां दागियां। इस अभियान मगरा अमरीकी राष्ट्रपति डोनाल्ड ट्रम्प होरें ईरान गी सख्त चेतावनी दिंदे होई आखेआ जे बारुदी सुरंग बछाने च शामिल कुसै बी ज्हाज जा किशती गी फौरी तौर पर नश्ट करी दिता जाग।

<><><><><><>

## SC-Acid Attack

सुप्रीम कोर्ट नै अज्ज केंद्र सरकार कोला जोआब मंगी भेजेआ ऐ कि तजाब दी परचून बिक्री पर पूरी चाल्ली रोक लाने लेई केह कार्रवाई कीती गई ऐ। अदालतै आखेआ ऐ कि एहदी बिक्री पर रोक लाने दे कन्नोकन्नी इत्त सरबंध्यै च सख्त नियम लागू कीते जाने लोड़चदे न। अदालतै एहू निर्देश तजाब दी बजों च सखल्ले थहोई जाने दी स्थिति गी दिक्खदे होई जारी कीता ऐ। सुप्रीम कोर्ट नै केंद्र, सबनें राज्यें ते केंद्र शासित प्रदेशें गी 6एं हफ्ते दे अंदर-अंदर तजाब हमले दे पीड़ितें दी बाआदकारी लेई बनकदे उपाऽ तैयार करी लैने दे बी निर्देश जारी कीते न।

<><><><><><>

## Semocon

सरकार नै देश च चिप निर्माण दे पूरे तंत्र गी बढ़ावा देने लेई अज्ज 1 लक्ख 27 ज्हार करोड़ रपे दे बजट आहली सेमीकान दे दुए गेड़ दी योजना गी अधिसूचित कीता ऐ। नमीं दिल्ली च इक संवाददाता सम्मेलन गी संबोधित करदे होई इलेक्ट्रानिक्स ते सूचना प्रौद्योगिकी मंत्री अश्विनी वैश्वणव होरें आखेआ कि एहदे कन्नै औंदे बरें च वैश्विक सेमीकंडक्टर बजारै च भारत दी हिस्सेदारी लगभग 10 प्रतिशत होई सकदी ऐ। उनें आखेआ जे भारत वैश्विक सेमीकंडक्टर वेल्यू चेन च इक बड्डी ते महत्वपूर्ण भूमिका निभाने बक्खी अगड़े बध्यै करदा ऐ। मंत्री होरें आखेआ कि सरकार दा जोर भारत गी वेफर निर्माण कोला लेइयै चिप उत्पादन तगर वैश्विक सेमीकंडक्टर वेल्यू चेन दा महत्वपूर्ण हिस्सा बनाने पर ऐ। उनें सेमीकान इंडिया कार्यक्रम दे दुए गेड़ दे सबनें 6 स्तम्भें दी अधिसूचना जारी करदे होई आखेआ कि वैश्विक सेमीकंडक्टर उद्योग कन्नै जुड़े दे लोकें गी भरोसा ऐ कि औने आहले दशकें च बड्डे पैमाने पर रास पूंजी लाने लेई भारत गै सबनें शा बनकदा ते भरोसेमंद थाहर ऐ।

<><><><><><>

## GDP-PM

प्रधानमंत्री नरेंद्र मोदी होरें चालू माली बरे दी पैहली तिमाही च भारत सकल घरेलू उत्पाद यानि जीडीपी 7 इशारिया 8 प्रतिशत रौहने गी इक बड़ी उपलब्धि करार दित्ता ऐ। अपनी इक सोशल मीडिया पोस्ट च प्रधानमंत्री होरें आखेआ कि तेल दिएं कीमतें च बाढ़े-घट्टे, सप्लाई श्रृंखला च रूकावट ते कुल संसारी सतह पर बनी दी जक्कोतक्की आहली स्थिति दे बावजूद बी भारत दी जीडीपी दा इन्ना मजबूत बने दा रौहना भारत दे लोकें दी सांझी ताकत ते पक्के निश्चे गी दर्शांदा ऐ। इसै दरान केंद्री खजाना मंत्री निर्मला सीतारमण होरें बी आखेआ कि इस मजबूत प्रदर्शन दा सेहरा देश दी जनता ते उंदी सख्त मेहनत दे सिरै पर शोभदा ऐ। खजाना मंत्री होरें आखेआ कि एनडीए सरकार आसेआ कीते गेदे सुधार ते अर्थ बवस्था दे कुशल प्रबंधन दे खरे नतीजे सामने अवा करदे ना।

<><><><><><>

### Prez. Textile Sector

राष्ट्रपति द्रौपदी मुर्मू होरें आखेआ जे कपड़ा सैक्टर ना शड़ा भारत दे सांस्कृतिक विरसे दा इक महत्वपूर्ण हिस्सा ऐ, सगुआं लक्खां बदे लोकें गी रोजी-रूट्टी बी उपलब्ध करोआंदा ऐ। राश्ट्री फैशन टेकनालजी दे दीक्षांत समारोह च बोलदे होई उनें विद्यार्थियें गी देसै दे समृद्ध सगोसार विरसे ते मुल्लें कन्नै जुड़े दे रौहने लेई प्रोत्साहित कीता। फैशन उद्योग च महिलाएं दी बदधी भूमिका पर लोहू पांदे होई राष्ट्रपति होरें आखेआ जे इस कार्यक्रम च हिस्सा लैने आले तकरीबन 4 ज्हार विद्यार्थियें चा तकरीबन 85 प्रतिशत महिलां ना। उनें नौजवानें गी 2047 तगर विकसित भारत दे बीजन च योगदान देने दा बी आग्रह कीता ते आखेआ जे विद्यार्थियें गी छड़ा नौकरी हासल करने आले गै नेई बनना लोड़चदा, सगुआं उनेंगी रोजगार पैदा करने दा लक्ष्य रखना लोड़चदा।

<><><><><><>

### Delhi SIR

दिल्ली च मतदाता सूचिएं दी नमें सिरेआ व्यापक ते पूरी जांच दे बाद अज्ज चुनांऽ आयोग आसेआ वोटर लिस्ट दा मसौदा जारी करी दित्ता गेआ ऐ। दिल्ली दे कुल 1 करोड़ 45 लक्ख दर्ज मतदाताएं चा लगभग 47 लक्ख 70 ज्हार मतदाताएं दे नां इस शुरूआती मसौदा सूचि च शामिल नेई कीते गेदे जेहड़ा जे कुल दर्ज मतदाताएं दा 33 प्रतिशत दे करीब ऐ। मजूदा ड्राफ्ट रोल च कुल 97 लक्ख 53 ज्हार 577 मतदाताएं दे नां दर्ज कीते गेदे न जेहड़े डिजिटल ढंग्गै नै मसौदे च दर्ज कीते गेदे ना। जिनें लोकें दे नां मसौदा सूचि च शामिल नेई कीते गेदे उंदे कारणें च घर-घर जाइयै कीती गेदी जांच दरान ओहू गैर हाजर मिले जां ओहू उत्थुआं कुसै होर थाहर उठी गेदे जां उंदी मौत होई चुकी दी ऐ ते जां फही ओहू डुप्लीकेट एंट्रीज दे दायरे च औंदे ना।

<><><><><><>

### Navy –Nipun

भारती नौसेना नै अज्ज मुम्बई च स्थित निस्टार श्रेणी दे दुए गोताखोरी सहायता पोत-डी.एस.वी-निपुण गी बल च शामिल करी लैता ऐ। निपुण दे बल च शामिल होने कन्नै भारत दे समुन्द्री हित आले खेत्तरें च बशेश अभियानें गी अंजाम देने दी भारती नौसेना दी समर्थ होर मज़बूत होग। एहदे नै भारत दी गैहरे समुन्दरै दे अंदर अभियानें ते पनडुब्बी बचाऽ च सहायता मिलोग।

<><><><><><>

## WB Ganga Water

पच्छिम बंगाल सरकार नै केंद्र सरकार गी आग्रह कीता ऐ जे इस बरे दिसंबर च बांगलादेश कन्नै समाप्त होआ'रदे 30 बरें दा गंगा पदमा जल बंटवारे समझौते गी परतियै नमें सिरेआ बहाल करने शा पैहले राज्य दे हितै बक्खी ध्यान दित्ता जा। राज्य सरकार नै नमें समझौते च पर्यावरण दी राक्खी ते भविक्ख च पानी दी जरूरतें गी प्राथमिकता देने दी मंग कीती ऐ ते भारत-बांगलादेश संयुक्त नदी आयोग दे माध्यम राहें तफसीली चर्चा दा बी आह्वान कीता। राज्य सरकार आसेआ इस सरबंध्यै च केंद्री जल शक्ति मंत्रालय दी इक तफसीली रिपोर्ट सौंपी गई ऐ। राज्य सरकार नै हुंगली नदी ते राजधानी कोलकाता स्थित श्यामा प्रसाद मुखर्जी बंदरगाह च नौवहन गतिविधियें दे सुचारू संचालन दी जरूरतै पर जोर पाया।

<><><><><><>

## Nepal Death Toll

नेपाल च पिछले हफ्ते आए दे विनाशकारी हाड़ करी मरने आहलें दी गिनतरी बधिये 903 होई गई ऐ जिसलै के 4 जहार 247 कोला मते लोक अजें बी लापता न। नेपाल दे राश्ट्री आपदा प्रबंधन प्राधिकरण मूजब एहू गिनतरी ऐतवारें 2502 थमां बधी गई ऐ। प्रभावित सबनें 8एं जिलें च लोथां बरामद कीतियां गेइयां न कीजे बचावकर्मी लापता लोकें दा पता लाने लेई लगातार कम्म करा'रदे न। इस दरान तकरीबन अद्दा दर्जन पनबिजली परियोजनाएं च घट्टोघट्ट 933 कम्मगारें दे फंसे दे होने दी शेंका कीती जा'रदी ऐ। बचाव दल भारत ते होरनें माहिरें दी मदद कन्नै त्रिशूली 3-ए सने तकरीबन 6 ब्लाक होई दी हाइड्रोपावर सुरंगें च तलाश करा'रदे न। तिब्बत च मरने आहलें दी गिनतरी 16 ते 546 लोकें दे लापता होने दी खबर ऐ।

<><><><><><>

## Weather

मौसम विभाग ने अज्ज ते कल ओडिशा ते छत्तीसगढ़ दे किश इलाकें च मौलेधार बरखा दी भविक्खवाणी कीती ऐ। अरुणाचल प्रदेश- बिहार- पूर्वी उत्तर प्रदेश- झारखंड- नागालैंड- मणिपुर- मिज़ोरम- त्रिपुरा ते उत्तराखंड च बी तेज़ बरखा बरने दे इमकान न। असम- मेघालय- पूर्वी मध्य प्रदेश- हिमचाल प्रदेश- जम्मू कश्मीर- लद्दाख- पच्छिम बंगाल- सिक्किम ते पच्छिमी उत्तर प्रदेश च बी अज्ज मौलेधार बरखा बरी सकदी ऐ। विभाग नै बिहार- झारखंड- कर्नाटक- केरल- माहे- लक्ष्यद्वीप- पच्छिम बंगाल दे कन्नै लगदे इलाकें- सिक्किम ते तेलंगाना च अंधी-झक्खड़ ते बिजली मिलने दी शेंका जाहर कीती ऐ। पूर्वोत्तर- भारत- मध्य प्रदेश- मराठवाड़ा- उत्तर प्रदेश ते उत्तराखंड दे किश हिस्सें च बी इससै चाल्ली दा मौसम बने दा रेही सकदा ऐ।

<><><><><><>

## MP-Weather

मध्य प्रदेश च मानसून दी सक्रियता गी दिखदे होई केई जिलें लेई भारी कोला मती भारी बरखा ते हाड़ औने दा ओरेंज ते रेड अलर्ट जारी कीता गेआ ऐ। सतना, चित्रकूट, मैहर, रीवा, सिंधी ते शहडोल जनेह इलाकें च पैहले सवां जारी बरखा दे चलदे ज्यादातर नदिएं ते दरेयाएं च हाड़ आए दा ऐ ते 21

जिलें लेई भारी बरखा दा अलर्ट जारी कीता गेदा ऐ। मौसम विभाग मूजब औंदे 2, 3 दिनें दरान राज्य दे ज्यादातर हिस्सें च लम्मी झड़ी लगने दे असार दस्से गेदे न। पूर्वी मध्य प्रदेश च चित्रकूट ते मंदाकिनी नदिएं च पानी दा स्तर 25 कोला 30 फुट तगर बधी गेदा ऐ। मुख्मंत्री मोहन यादव होरें हाड़ प्रभावित इलाकें दे लोकें लेई बनाए गेदे सुरक्षित आसरमे दा दौरा करियै उत्थे कीते गेदे इंतजामें दा मुआयना कीता।

<><><><><><>

## Football

भारती दी 20एं बरें कोला हेठली उम्मी दी टीम अज्ज ताशकंद दे दोस्तलिक स्टेडियम च सीरिया दे खलाफ ए.एफ.सी-यू-20 एशियाई कप क्वालीफायर अभियान दी शुरूआत करा करदी ऐ। भारत गी ग्रुप बी च मेजबान उज्बेकिस्तान ते बांगलादेश कन्नै रक्खेआ गेआ ऐ। 2006 दे बाद भारती यू-20 टीम पैहली बारी एएफसी यू 20 एशियाई कप च वापसी लेई अभियान दी शुरूआत करै करदी ऐ।

<><><><><><>

## ICC Women's Cricket

अंतर्राष्ट्रीय क्रिकेट काउंसल-ICC नै श्रीलंका क्रिकेट दे प्रशासन च सरकार दी दखलंदाजी दे कारण 2027 च होने आली पैहली महिला चैम्पियन्स ट्रॉफी दी मेज़बानी दा अधिकार श्रीलंका थमां वापस लेई लैता ऐ। इक रिपोर्ट मूजब- श्रीलंका च मेज़बान मुल्ख सनें 6एं टीमें दे कन्नै महिला टूर्नामेंट दा पैहला संस्करण आयोजित होने आला हा पर इस फैसले कन्नै श्रीलंका दी भागीदारी बी प्रभावत होई सकदी ऐ।

<><><><><><>